

秋
水
閣
詩
集

序

童年塾中見人手錄許秋巖先生應試詩及七言律數
首誦之止覺聲調清華初未解其旨趣也既冠學詩先
生已出典名郡末由問津迨觀政比部歷十餘年先生
洊擢少司寇屬在堂司日勞勞於律文例義未嘗言詩
先生沒後三十年哲嗣亮甫大令寄秋水閣詩集鈔本
以書囑余評選將以付梓余受而卒業則先生自少壯
以迄晚年諸吟詠篇什具在如聞其警欬焉先生詩得
扶輿清淑之氣自適其適雅不欲以詩鳴詩稿散存於

家未加編定且命亮甫毋庸流播與當代詩人較毫釐
分寸是以世第見其偶爾題詠之篇遞相傳誦每以不
得觀全集爲歎亮甫恐其久而遺失分手謄錄欲求精
選而後刊行可謂善於述事者矣夫著作之家先慎選
擇蒼萃精華猶存古意而余非深於詩者何克當此重
寄然不得謂之竟不知詩也迺憶先生敷歷中外豐功
偉績上答

聖主特達之知凡有裨於國計民生措畫無不各盡其
誠而行之無不力澤被數省爲一代名臣詩名遂爲動

業所掩展讀全集畢生之境遇人品學問經濟一一流露其間詩之秀骨天成典麗沈雄皆有清氣緯之固有目者所共覩奚必余之評選始足傳耶集八卷不分古近體就交際之人其事其時其地序次均本編年爲式後之人誦其詩知人論世據爲先生年譜亦無不可但字經傳寫不無魯魚亥豕之譌略爲校正自慚聞見淺鮮不知者仍因其舊謹敘數行用識年月隨原本寄歸亮甫聊酬專函懇摯之意慙速付剞劂氏庶幾成亮甫述事之美亦以其將屆七旬余又當遲暮之年俾得

目觀附名簡末爲榮然而歲月如流存沒今昔之感益爲之歔歔而不自禁也昔

道光歲次甲辰春三月姻世教弟程懷璟頓首拜識於鄂城九桂軒時年七十有一

原缺

雲夢縣志人物傳

許兆椿字茂堂號秋巖乾隆壬辰進士散館授編修歷充武英殿纂修四庫全書摘藻堂蒼要分校官方略館協修永樂大典分校官遼金元三史纂修官

文淵閣
文津閣

覆校官轉福建道監察御史改官刑部江西司

員外郎總辦秋審律例館提調升廣東司郎中當其初入刑曹自以起家詞館未嘗畱意刑律及閱文卷兢兢有得曰此不過準情酌理傳之定律惟在此心無偏無執不急不怠而已尙書胡莊敏公季堂一見深器之謂

其洞達律意未易才也自是各省要案馳驛四出歷奉
天吉林黑龍江直隸江南湖北湖南河南陝西山東十
五次鞫辦

欽部案件取供定稿一手經理各上台倚若左右手諸
奏摺悉當

聖意保舉繁缺道府 京察一等引

見記名授江蘇松江府知府值歲歉盡心民瘼力請緩
徵並倡捐廉俸煮粥活人無算乙卯冬調補江寧首府
守郡七載培士愛民無不勇於施爲鹽巡道缺出經宮

保大學士前總督費公淳奏請以兆椿升補格於成例
未准而欽奉

上諭有許兆椿平日居官朕所稔知之

旨任內兩署江寧鹽巡道兩署江安十府糧道 卓異
入都啓程時前後積雨是日晴霽闔城紳士兵民頂香
奉酒者填塞道路有天借晴明爲好官之頌引

見記名請

訓垂詢政事履歷極詳有不由岳起保汝朕久已知汝
卻未見過之

諭辛酉十月補授江南河庫道癸亥五月調蘇松常鎮
糧道甲子十月補授江西按察使乙丑八月調浙江按
察使入

覲奏對之次

溫諭汝在江寧官聲甚好汝能辦事操守甚好之

褒丙寅六月升江寧布政使戊辰六月內擢刑部右侍
郎九月轉補左侍郎充覆校鄉試硃卷大臣己巳會試
搜檢大臣三月授倉場總督旋授兵部侍郎都察院右
副都御史廣西巡撫十二月調補漕運總督壬申八月

擢工部右侍郎旋轉左侍郎署吏部左侍郎調吏部右侍郎

欽派從耕藉田大臣癸酉三月授貴州巡撫先是訪知倉場已革蠹役高天鳳盤踞倉廩多年串通人役作弊奏請緝獲交刑部嚴審得實高天鳳問擬斬決餘從軍徒有差其於漕運總督任內實力除弊漕務爲之一新鐵冶亭尙書保恭集

聖訓字製一聯贈之曰知大義不貪小利持定見要作好官蓋紀實也官翰林部員時充庚子癸卯丙午戊申

順天鄉試辛丑會試同考官得人最盛若倉場侍郎潤
祥通政使王友亮兩江總督魏元煜兵部尙書白鎔山
東布政使朱錫爵刑部侍郎彭希濂貴州巡撫曾燠尤
有聲於時在貴州巡撫任懲辦搶劫匪苗

上嘉之嗣內調刑部侍郎旋授浙江巡撫未赴任於嘉
慶甲戌年五月以疾卒於京邸年六十有八綜其生平
遇事持正見事明決不爲浮議所移自刑曹出守游擢
司道外厯封圻內陟卿貳上結

主知下協輿望僚屬亦莫不孚契敷厯四十餘年清操

峻節始終如一養廉有餘喜敦義舉捐二千金製造雲
夢學宮祭器修葺聖廟壬戌歲旱捐二千金買米減價
平糶分濟戚友之窘乏性孝友濶達家務付之諸姪不
問出入之數察從子之可入仕宦者爲應例就教職者
二縣佐二族之待以舉火及養於家者數十人鄉里頌
其德公請入祀鄉賢祠江孟士民請入祀名宦祠廷議
僉同嘉慶二十一年 月奉
旨許兆椿平日居官立品俱孚物望准其入祠國史有
傳著有秋水閣詩集若干卷

秋水閣詩集目錄

卷首

程序

國史館大臣傳

雲夢縣志略人物傳

卷一 古近體一百首

卷二 古近體一百二十首

卷三 古近體一百一十六首

卷四 古近體一百六首

卷五 古近體一百一十七首

卷六 古近體一百四十二首

卷七 古近體一百七首

卷八 古近體九十首

家嚴擬刻先大父秋水閣詩集繕寫副本未竣
忽慘溘逝不肖方增等凜遵遺訓起繕開雕苦
塊餘生未能詳細讎校錯誤在所不免伏冀

大人先生教示不逮歿存均感先大父尙有奏
疏及古文若干卷年久稿多散失俟檢齊彙刻

就正方增等敬識

國史列傳

許兆椿湖北雲夢人乾隆三十七年進士改庶吉士四十年散館授職編修五十一年轉福建道御史十月以湖北孝感縣武生梅調元活埋多命一案本籍科道未能參奏奉

旨交部議處降一級調用遵例捐復對品補用五十二年選補刑部員外郎五十五年升郎中五十九年授松江府知府六十年調江甯府知府嘉慶六年擢江南河庫道八年調蘇松糧儲道九年擢江西按察使十年調

浙江按察使十一年升江寧布政使十三年六月擢刑部右侍郎轉左侍郎十四年調補倉場侍郎四月授廣西巡撫尋以倉場侍郎任內舊太倉米色霉變不行查明率請支放經鑲黃旗漢軍都統綿億將米樣包封呈驗請

旨懲辦

命交部議降二級畱任先是許兆椿偕倉場侍郎福慶密奏通州中西二倉白米多有虧缺並積蠹高天鳳私用花押白票裝米出倉種種弊混

上命侍郎托津及福慶會同新任倉場侍郎玉宣戴均元詳細查勘五月托津等查明西倉地字厰短少白米七百餘石中倉法字厰短少白米四百餘石此外厰座與原貯數目多有不符提訊高天鳳確係積年在西倉經手糧務之人奏請解交刑部審辦

諭曰福慶許兆椿到任未久能將此等積弊訪查奏聞得以根究查辦尙爲畱心伊二人前因舊太倉米色霉變部議降二級畱任處分著加恩銷免十二月授漕運總督十五年偕兩江總督松筠奏請減造江廣漕運剝

船五百隻節省銀四十萬兩分撥江廣三省發商生息
以爲隨時修葺之費

上躉之十一月以回空漕船渡黃安速

命交部議敘十七年五月以南糧四月二十八日卽行
全數渡黃

恩予甄敘七月奏浙省温州後等五幫漕船旗丁疲乏
經漕督鐵保於嘉慶七年疏請停造十八隻將所有糧
米酒帶本幫其應領錢糧卽照酒帶米數分給各丁十
年後察看情形如果丁力漸殷再行成造茲屆十年期

滿查丁力仍屬拮据承簽造船實屬不易且該五幫自
停造疲船以來本幫洒帶漕米每船止多裝六七石
並無負重之虞每年各丁攤給錢糧三四十兩於現幫
亦多有益請將疲船永遠停造以省幫累

上允其奏尋以倉場侍郎榮麟等奏查驗興武六幫米
色灰暗分別辦理奉

旨此次蘇松兩屬漕糧灰暗者多至數千石許兆椿籤
盤草率著交部查議尋議降一級畱任八月補工部右
侍郎轉左侍郎十八年正月調吏部右侍郎三月授貴

州巡撫會黎平府匪苗歐桃等欲爭佔學額藉向各寨
斂錢漁利恐生童應考所圖不遂造貼無名傳單多方
嚇阻並糾無賴苗衆將應試之三十五家肆行搶劫拆
毀房屋兆椿移檄古州鎮總兵帶兵六百名馳赴黎平
擒獲歐桃正法傳首犯事地方並首從一百五十一犯
全數弋獲依律嚴辦奏入

上嘉之十九年正月補刑部左侍郎四月署倉場侍郎
尋授浙江巡撫未至任以病奏懇開缺調治是年五月
卒二十一年題准入祀江蘇名宦祠

秋水閣詩集卷一

雲夢許兆麟
同邑程懷瓊
玉巖

古近體

題于喁草卽和錢訥生蔣子宣二先生韻

三百詩之原簡編有陳迹下追漢唐間流風遵古昔故
其工之者往往透肝膈卻笑世間人紛紛言奪席比之
風雅中奚啻雲霄隔持此觀天下誰能奮鵬翼錢蔣二
君子獨有陶鈞力筆勢挾風霜琳瑯投報亟古氣橫九

州盎然照顏色快讀破吾愁豪吟令人憚擲地有宏聲
淵淵出金石據卷正快然不知東方白

和錢訥生先生到京言志原韻

名流傾倒客途中鶴矯霞軒迥不同殊笑碎琴傷激烈
奚煩問卜識窮通霜清北塞勞賓雁花落西風響候蟲
索寞金臺何處是夜深獨對一燈紅

豈羨朱門鶴蓋陰長懷山水有清音縱逢伯樂增高價
不效相如獻上林客路紅塵空沒脚故園黃菊最關心
歸來擬著閒情賦滿徑蕭蕭落木深

涼風颯颯報新秋
旅邸開尊足破愁
洒落不須求失馬
冲和盍計觸虛舟
於今義獻真堪敵
自昔錢郎本並優
翰墨共珍千古事
區區青紫白雲浮

萍飄梗泊滿天涯
君在燕臺歸興賒
韻事長琴兼短劍
奇文秋實共春華
詎因求祿腰常折
不肯逢人手便叉
重望自應爭結襪
休言高臥看山花

和錢訥生先生玉峯秋興元韻

山光掩映照松寮
野色平分度小橋
三逕烟雲藏古寺
一庭風雨話殘宵
寒螿依砌聲將壯
邊馬當秋氣倍驕

閉戶浩歌還自得何須健羨幣相招

鱗鱗典籍可摩挲不向元亭載酒過靜掩書幃秋易老
閒聽砧響恨偏多心知伏驥難奔逸目送飛鴻作笑歌
蕭颯金風珠露冷左思招隱興如何

十載磨礪學未成涼風瑟瑟話平生誰家玉笛關山月
到處芙蓉錦繡城已老潘郎猶有意傷秋杜甫豈無情
晴光點點林中映直欲翻身入太清

高原獨上醉中看不盡疎林帶曉寒交意渾如秋意淡
閒心常比世心寬風搖野竹聲多勁月映溪沙色可餐

聞道先生多刻羽，拈毫學步一憑欄。

秋晚訪孫遠堂不遇

秋晚閒相訪，蕭然一草堂。
雲深人不見，衣薄體多涼。
落葉空階舞，奇書靜室藏。
林中驚犬過，錯認吠孫郎。

秋日偶成

萬里江山迴，三秋木葉深。
浮雲連海角，落日漾波心。
笑盡杯中物，時聽院外琴。
臨風懷謝朓，滿引發狂吟。

秋日送人之塞上

殷勤相送別，一去路迢迢。
野店短歌促，長城飲馬驕。
暑

隨香國遠秋共道途遙何日還投筆名同定遠招
四海爲家日何妨出玉門霜濃行有迹霧重遠成村民
物兼中外山川總激吞聞歌應慷慨按劍與誰論
計爾停驂日邊庭草欲衰好將豪俠意直上單于臺寶
鐙飛沙撲龍泉夜月開酒徒今在否燕市儘徘徊

貴池陳寶幢以中秋偶題三律索和走筆奉贈卽

次原韻

奇句驚人掩月光知君卷軸久撐腸情文互見誇雙絕

思親懷遠
悉見詠歌

形迹相違卻兩忘

署中不
能常晤

蓮幕逢迎裁錦繡

時君爲
書記

玉堂懷抱薄膏梁
廣寒宮裏堪同上
佇聽霓裳

韻抑揚

鶴矯霞軒迴軼羣
筆精墨妙解紛紜
評稱月旦應慙我
德應星文獨羨君
此夕高吟宜撒燭
他年作賦欲凌雲
不須蟾窟吳剛斧
折取天香到處聞

綺疏點點露華侵
讀罷君詩玉漏沈
醉月休忘投轄意
坐花時結斷金心
不逢狗監期推轂
好向龍門覓賞音
莫慮塵容猶未滌
陽春一曲豁煩襟

送燕

風雨淒涼失翠嵐，烏衣客去意何堪。筵前忽作三秋別。

梁上誰聽半日談。

古詩有燕聽梁上無私語句故云

辭壘傷心還下上。

臨歧戀主尙呢喃，試看指日瀛洲近。好整雙翎落海南。

秋日偶成

虛堂寂歷氣蕭疎，景色清幽足自娛。風颭落花紅蕩漾，
煙橫遠岫翠模糊。詩懷偏欲邀明月，歸思非專憶碧鱸。
一片閒情何處寄，斜陽點點數棲烏。

九日二律次陳寶幢元韻

光景無邊入暮秋，况逢佳節足遲留。閒情未採東籬菊。

遠道空懷黃鶴樓，山水清幽供筆墨。
文章聲價重驂騑，何時得侍曲江宴。
詩句吟成共報投。

節屆重陽興倍豪，詩情不受兩風撓。
萸房豔豔寒香遠，雁陣堂堂碧漢高。
劇飲參軍惟愛孟，歸來處士獨憐陶。
天家詔祿尋常事，何必隨人食鹿麋。

獨立

雲翳長空薄，似羅閒庭獨立意。
如何遙看晚樹疎，成密細數明星少。
覺多雁落碧天傳，遠信蛩吟黃葉和。
清歌莫言近市常，囂雜延佇猶堪當軸適。

挽凌東岩夫子

追陪色笑已無辰，昨歲臨歧不再親。
天下至情留弟子，古來薄命是文人。
遭逢坎壈惟餘傲，心地高超不識貧。
痛哭每將殘簡讀，好從夢寐接丰神。

瓶中桂花秋海棠同插步孫又園先生韻

桂藥由來月窟珍，况將豔質卜仙鄰。
膽瓶映采雲霞麗，鼻觀聞香旦夕親。
特遣紅顏隨學士，儘教金粟贈佳人。
頓忘生不同時恨，欲傲孤山景色新。

紅葉

一抹丹林石逕栽，高高下下絕塵埃。
枝當缺處霞來，葉欲紅時霜作媒。
畱得春光迷古渡，分將夕照拂雲隈。
九秋點綴蕭騷景，莫把隋宮翦綵猜。

九月十五日霜降節對月漫興和韻

點點清光漾素秋，節逢霜降景逾幽。
千門月度砧聲急，萬里雲開露氣收。
聞雁已知關塞冷，乘槎還憶廣寒遊。
蕭森景象心俱淡，瞬息炎涼一水漚。

疊韻

最銷魂處是三秋月，到天心夜色幽。
薄霧盡從空際散

清風時向袖中收，笑看短劍燒長燭。
欲寫新詩憶舊遊，莫道吾儕無進取。
功名原不等浮漚。

再疊

金風瑟瑟值殘秋，節過重陽興尙幽。
松暗月來三逕爽，天高雲度一杯收。
山川到處皆成畫，琴劍攜來足伴遊。
藏拙自慚逢

聖世，豈將勳業付池漚。

初冬

秋光老去令初更，槭槭園林朔吹輕。
落葉滿山山瘦削

新霜洗月月晶瑩籬邊晚菊畱殘豔雲際征鴻曳遠聲
共說小春風景好陰凝早肇一陽生

十月雨

正逢納稼滌場時無那重雲遍野垂雨急疎牕飄細細
風酸溼葉落遲遲添來書幌三分冷催就騷人一首詩
卻喜黃花猶兀傲幾枝爛漫傍東籬

陳寶幢見示冬夜二律次韻奉和

霜華送冷透青衫入夜盲風更覺嚴久坐但聞更漏滴
消寒好把酒杯銜招尋二仲來三徑珍重雙魚達一函

卽此已堪離俗垢何須高語脫塵凡

自笑頑愚待訂砭那能詩律鬪清嚴卻看白雪誇無敵
漫寫紅牋愧不謙五夜風聲寒入夢半庭梅影瘦依簾
睡餘已覺東方白一抹疎林帶曉暉

冬晴

野人多愛日曝背對晨暉茅屋輕霜失梅林乳萼肥葉
乾供淪茗氣暖不添衣卻笑金門客猶然列妓圍

田家冬日

室窄冬偏暖林疎鳥自稀犢眠平地穩雞啄剩禾肥新

酒招朋舊閒身遠是非鄰翁相對語真率倍依依
長至無多日融和似小春羣兒爭落果山犬侮生人且
喜輸官稅何妨過比鄰前村正賽會簫鼓鬧聲頻
稻穫人無事天寒室少朋北風潛入戶黃日淡融冰隈
曲常生草枝枯尙掛藤夜來微雨過共快麥苗興

花朝

初銷積雨滴晴嵐百卉今朝瑞色含雲氣往來峯六六
花容爛漫徑三三桃源春早紅應綻柳市煙橫綠未酣
寄語東皇須愛惜平生酷嗜不嫌貪

春雨

斜風密雨一時兼，春氣濛濛意不忺。
柳色橫塘疑淺黛，梨花小院隔疎簾。
鶯簧欲弄音偏澀，燕壘初營溼易沾。
莫道尋芳停蠟屐，懸知麥隴綠頻添。

清明

春光冉冉到清明，淡蕩東風雨正晴。
梅豆初圓含綠意，桃顛微綻釀紅情。
內官拜手分榆火，牧豎歡顏散粥餿。
一自踏歌南陌上，鞦韆院落已無聲。

上巳踏青二首

楊柳青青淡籠煙河頭畫舫陌頭鞭每緣祓禊來佳處
更喜晴明值暖天士女尙仍天寶俗風流誰繼永和年
祇餘劍氣干牛斗爲問龍泉若箇邊
尋芳日日盼芳辰光景無邊入暮春未必不祥除可盡
卻逢佳節運猶新緋桃初織天孫錦碧草還承學士茵
應羨興公多逸興彩毫飛處賦詩頻

春遊十首和杜振三原韻

到處兒童散粥餉春風習習踏春行遠山一點浮青黛
好似蛾眉學畫成

蜂狂蝶鬧百花叢我愛清陰綠柳中
白袷青衫頻選勝
爲憐春色去匆匆

楊柳梢頭籠曉烟春光銷盡落花邊
啼鶯解識人間樂
宛訴清明景萬千

隨意尋春坐石苔春畱人住每遲徊
賞花不慮清罇盡
紅杏村中沽酒來

又到嬉春新酒時魚翻湘縠綠差差
竹籬茅舍無人到
一片山光落酒卮

曲曲朱欄繞畫廊攜筇閒步笑疎狂
遙看水綠霞紅處

知是東君著意妝

古樹森森列爪牙白雲深護野人家日長村女無他事
香水溪頭競浣紗

聲聲鳥語喚人遊風入羅衣春似秋還想長安三月暮
紛紛開宴曲江頭

緋桃紅綻畫橋西疑有漁郎問此溪春色儘教吟咏見
奚囊到處好相攜

春風駘蕩到芳郊幾欲幽棲住草茅長笛一聲歌數闋
閒將柳瘦再三敲

齋中苦熱風雨忽至

晴空杲杲爍流光蒸鬱還同馬季長兀坐忽聞風浙瀝
遙看漸覺雨淋浪蒼煙一抹橫前浦溼翠千層接野塘
彈指炎涼本無定西來爽氣到書堂

送杜振三歸崑山

相見忙時別亦忙霏霏酥雨灑行裝遙知帶水揚舡去
猶憶吳門一草堂
一片煙雲入望多依依握別意如何知君囊內添新句
好令奚奴著意馱

書幌殘燈共寂寥分襟南浦黯魂銷扁舟載去江郎夢
夜半桃花淺水潮

纔沐春風匝月餘又看判袂賦歸與不須別後添惆悵
尺素頻將付鯉魚

雨後步月

一帶深林靜不譁晚涼天氣野人家雲容黑白初收雨
月色蒼黃淺護霞難向酒杯尋樂事還研詩句覓生涯
良宵擬向前溪去踏碎寒光作玉花

秋夜

曲院涼生暑氣收
蕭蕭梧影早驚秋
花前月度詩情韻
松際風來畫意幽
螢點綠牕微覺冷
蛩吟黃葉不勝愁
吟缸刀尺情何限
憶到關山誰與謀

佛手柑

木奴也自號金仙
指掌分明儼一拳
不是拈花微解笑
餘香那得自年年

盤中簇簇掌初黃
供向蓮臺發異香
悟得禪機惟一指
案頭還倩作慈航

壬午初春

斗杓東指氣初迴

萬乘歡呼動地來
柳色漸隨輦路發
花容畱待鼓聲催
無邊雨露添新潤
不盡珠璣獻舊才
我亦瞻雲歌擊壤
問誰此日占春魁

瞥見春光又一年
今朝昨歲事堪憐
分甘已杳惟餘淚
遺視空存欲問天
厭世有心乘白鶴
尋思無路到黃泉
撩人煙景偏增恨
寂歷深林聽杜鵑

去冬 大父
拙齋公下世

二月朔大雪

剛逢二月豔陽辰
開戶驚看地似銀
密灑平塘添綠水

亂飄紫陌壓紅塵四圍積素還同臘五出疑寒掩卻春
莫畏風饕停蠟屐山橋踏去野梅新

題宜壽寺雙塔和韻

偶向禪家一叩關森森雙塔足登攀東西各現光明相
上下難分伯仲間烟霧送迎迷遠岫雨風離合擬仙山
塵根從此皆清淨好把鶯花綺語刪

寺樓晚眺

落日銜山色黯然高樓極目盡雲煙遙邨人語燈成市
隔浦漁歸柳貫鮮每爲疎鐘催薄暮非關長笛起清眠

焚膏好更攤書卷禪版無從索祕詮

擬迎

鑾曲六首

蒼龍初駕惠風和南國聲聲擊壤歌揚子江頭春水漲
翠華到處卽恩波

二月江南春色稠天然圖畫望中收街衢不用張繒綵
爲有卿雲在上頭

桃花如錦柳如茵天放新晴待

聖人縱有霏微疎雨滴亦爲輦路一清塵

山色玲瓏翠接天

六飛臨處倍清妍
依依最是堤邊柳
三拂春旗十二年
高懸朗鑑仰

宸衷收盡珊瑚鐵
網中凡卉亦能沾
雨露一齊點綴

上林紅

日麗雲開雉尾移
臣民齊切就瞻思
葵忱祇有三多祝
不上相如封禪辭

上巳二首

不問長亭與短亭
芒鞋踏處儘遲停
花容拂水都成笑

柳眼窺人亦學青
數見春光多嫵媚
莫嫌鶯語太丁寧
笙歌一片紅樓裏
欲向風前仔細聽

無邊光景滿郊坳
細草堤前任踏青
佳日儘堪尋柳市
清風何處問蘭亭
鳥啼芳樹翻新譜
人在春山入畫屏
得句自慙非白傅
誰將令節換仙醺

雪後復雨賦此禱晴

蒼茫入望盡濃雲
雪後廉纖細莫分
楊柳陂塘春寂寂
清明時節雨紛紛
用杜司動句
半篙綠水波初漲
三徑紅英氣不薰
欲問東皇難寄語
暫將雅意託桐君
陳后山詩云人生亦

何須有酒
與桐君

師子林

塵市喧闐地數弓
園林人巧奪天工
恍疑西竺來南國
宛見金精臥法宮
池面參差徐吸水
洞門紆折巧迴風
歸來不敢重題筆
盡受鈞陶

聖藻中

新秋早起

桃笙漸覺嫩涼侵
朝爽西來接綠陰
樓外殘鐘尋曉夢
牕前淡月畫疎林
新泉密灑花枝潤
冷露初溥雲逕深

暫作遠公池上客何須高語脫華簪

秋日雜書

金風瑟瑟洞庭波不作詩魔卽酒魔剩有綠蕉題短句
可無紅友壯高歌
牕虛月夜蛩吟細夢破秋聲落葉多
却笑深閨小兒女雙雙指點說星河

發蘇州戲書

到處名山共結鄰一帆風送大江濱
奚囊檢點無新句
辜負江南十載春

登金山

豈有神鼇戴碧淵孤撐一柱鎖雲煙遙連吳楚平分勢
高障東南半壁天夜靜疎鐘聞塔頂簾開寒月湧牕前
蓬萊底事多尋覓只此相畱可判年

金陵

滾滾濤聲走石頭一帆直送古神州羣山積翠環城郭
遠樹彫青露驛樓幾度瓊枝歌怨曲何人玉笛繼風流
可憐兩岸蘆花白不必人言我欲愁

過蠓磯夫人廟

一葉輕舟破曉寒望中古廟峙沙灘秋風不信江南好

暮雨空悲蜀道難石壁苔痕侵寶劍遠峯嵐氣溼雲冠
應知靈爽今猶在磯下蛟龍不敢蟠

江邊晚步

落照亭亭映水湄長堤閒步自尋詩風平舟過帆如定
樹密人來鳥不知九子卽九華山雲歸秋色老一江月上晚
潮遲桓伊難見袁宏去獨咏湘蘭寄所思

晚秋感懷

點點歸鳥逐雨來虛堂寥寂獨徘徊半庭黃葉秋蛩老
一夜寒霜野鶴哀落盡柳條餘舊夢燒殘蠟炬換新灰

江東渭北無消息日暮空教進綠醅

書事

叩門剝啄訪疎慵坦率容儀散淡胸徑不埽花同杜甫
家無長物笑王恭袖中每有愁春賦牕外還看滴翠峯
慚愧主人情薄甚惟餘明月影溶溶

梅

身是蓬山第一香
謫來塵世領羣芳
見猶恨晚夫和靖
生不同時聘海棠
十里煙深迷老樹
三更月淡認新妝
夜來獨向堦前嗅
疑是東君散玉光

春日

春光點點透梅梢廿四東風過板橋花影一簾雲一室
數聲送出李郎簫

寶劍歌

豐城寶劍名莫邪張公得之藏之家臨風爍爍橫秋水
精氣變幻成龍蛇掩映光芒纏錦繡玉匣處處裝金花
燕山壯士猛如虎短衣酒後拔之舞天上搖搖北斗星
庭中陣陣梨花雨燭龍乍見驚且逃行雲四散天爲高
須臾劍氣化明月萬里一碧虛秋濤

馬上見梅口占

煙光澹蕩日光遲籬外橫栽玉一枝不是灞橋風雪重
何因畱得待芳時

花朝

春分剛過又花朝雲氣氤氳霧未銷一樹桃花紅不了
漁郎何事趁輕潮

德安懷古

孤城直上萬峯頭望裏雲煙面面浮南下長波通漢水
春時絃管唱涼州斜陽何處夢中澤野草應憐太白樓

底事登臨發惆悵好持尊酒問風流

上巳二首

雲澹長空細雨停和風吹處響金鈴
觴浮曲水隨花瓣草長春山綠畫屏
自有清談同洛水何人灑淚問新亭
流鶯不解心中事喚起垂條萬柳青

晴薰紫陌漾遊絲細踏長堤倒接離沂水
春風歌點也茂林脩竹醉羲之
桃花無語依山徑粉蝶多情鬧酒旗
記得興公修禊日彩毫飛處賦新詩

牡丹

不論深紅與淺紅。枝枝含笑倚東風。自應豔占春三月。
何處香浮露一叢。亭北闌干人獨倚。江南煙雨夢頻通。
夜深還向花陰坐。知是蓬萊第幾宮。

賣馬行

隨州人龔剛武。勇善射。失意賣馬作歸計。予心傷之。

有馬有馬白如雪。腰捲拳毛蹄裹鐵。眼光閃閃落金星。
千匹萬匹齊。劣一人牽置古道傍。閒齧野草春風香。
路有過者試相問。未語意氣先徬徨。自言本是千金子。

家住平原人莫擬學書學劍總不成去向南山抽鐵矢
有時酒醉逐山麋兩手開弓叫餓鳴風滿四蹄塵散亂
長空灑血毛離披因此寶馬如寶玉洗以清泉飼以粟
金勒常持玳瑁鞭錦鞵多襯芙蓉褥誰知失意遂蕭條
金盡牀頭敝黑貂牽向路傍人莫問當年悔不換雲翹
我聞君言心似醉勸君休墮窮途淚買者爲誰賣者誰
區區何預心中事君不見六朝文物自風流玉樹花空
結綺樓試向鍾山山頂望鷓鴣聲滿綠楊洲

舞劍

霜逼平林夜月白
寶光埽蕩寒無迹
怪風團起吼驚雷
萬道蛟龍飛破壁
把酒看君氣欲豪
鋒芒直壓烏孫刀
太平豈有不平事
提向秋江洗怒濤

一雨

一雨竟六日淒然
四月秋野塘遲水
色清夢上漁舟簾
靜多攤卷溪深不
受鉤最憐牆角外
紅委海安榴

玉樹

玉樹瓊枝夜夜來
水邊簾下共徘徊
春風暖襯芙蓉褥
斜月新添鸚鵡杯
韓掾有香生冶袖
宓妃無枕費清才

可憐滿徑蓬萊紫換得相思一寸灰

積雨初晴月色爛然因賦

浮雲一散便娟娟磨洗連朝更爛然影到平池明積水
光生垂葉破寒煙琴調舊譜聲猶重人喜新晴倦不眠
怪得青衫添宿潤闌干倚遍畫牕前

編籬

稍截臨溪竹斜編麕眼籬夜深分月影風定挂藤枝著
意栽新菊無心釣碧池休憐才用小花幹賴扶持

聞早蛩

不解天公意，還增恨客愁。
三更清入夢，六月夜驚秋。
草際燈斜照，牕前霧半收。
可憐桐葉落，吟遍楚江頭。

納涼

爽氣澄空碧，色齊閒庭人。
靜草萋萋月，扶花影依牕。
近天壓星河，入戶低露下。
有光明密葉，蛩吟無韻聚。
新哇極知紈，素裁團扇涼。
意迎秋不忍題。

孫男方

墀小岩
增菴川
坪季平

校字

秋水閣詩集卷二

雲夢許兆椿秋巖氏著
同邑程懷璟玉農參閱

古近體

對月有感

清思渺無際招愁始悔看
最憐和影瘦獨立想朝寒
水盡波留色光全夜惜闌
微聞吟落葉何處是長安

秋感

雁叫長天酒不辭
聲聲唱出古相思
蒹葭水國空修阻

風雨羅浮自合離紅藕有香秋影熟綠牕無語夢魂遲
銀河未許分牛女一度秋風一定期

半是離思半是愁秋風吹上木蘭舟柳枝憔悴人空折
客舍蕭條鶴不畱十里晚烟吟落葉一江寒雨夢山樓
懸知孤渚蘆花岸越石應悲繞指柔

郭外遠步

雁落暮雲平芳郊逐晚行長風悲大野古樹聚秋聲白
髮憐潘岳窮途笑步兵何當具雞黍報歲結村盟

訪人邨舍

步出城南度小橋一溪流水碧迢迢長堤草淺嘶官馬
老樹枝多聚野樵茅舍避風人向日新田潤雨麥生苗
閒行爲愛邨居景忘却林中有客招

竹籬障處是柴門松菊蕭疎種瓦盆應客蓬頭王霸子
分甘娛目右軍孫新篔簹裏浮香氣霜葉畦邊浸土痕
坐久不知歸路遠一鉤淡月挂江村

雪

入戶楊花著樹梅人間幻作小蓬萊迷離十二峰前路
壓斷寒雲埽不開

雪霽東萬遐亭丈

玉女牕前青鳥舞瓊翎亂落飄寒雨千峰一夜爭體體
幻作人間白玉宇渾如海上見三山十二珠簾杳莫數
又疑皎月升九虛繁星斂光不敢吐塵氣欲清萬籟空
母乃上騰廣寒之靈府我攜鐵笛憑闌干吹徹梅花十
里寒梅花落盡春不見團團萬頃水晶盤江山清峭寂
無語未許狂風相摧殘曠然長望不可極直欲踏雲乘
青鸞左挹葛元袖右把浮邱肩凌空一舉何灑然千年
元鶴任蹠躔紛紛餘霞落我前雲中矯首一回顧惟見

鱗鱗溼瓦浮青煙或云此境不可得不如馳馬長堤北
草枯鷹疾馬足輕那知泥濺黃金勒何事騎驢向灞橋
呻吟常畏風蕭騷豈知黔首茅簷下正埽寒雲望野苗
歲盡

角聲吹徹曉天寒銀漏迢迢夜未闌鐵笛自憐關塞冷
綈袍休訝客衣單一川紅日光浮動萬里黃河勢折盤
獨有梅花開滿樹幾回醉向雪中看

起舞

曉風殘月不堪題楚尾吳頭望欲迷塞雁大都衣帶雪

秋聲最是日沈西多情紅豆拋餘懶無計金罍醉似泥
猶有吳鉤離未得殘宵起舞聽荒雞

自冬徂春塵事碌碌久不復親書案矣作此自嘲
自慙筆墨盡塵封碌碌連朝漫笑慵鼠迹分行登小榻
臆櫺斜閉謝山峰竹埋殘雪花難埽人醉春風夢亦濃
何事鄰家梅月夜書聲半雜五更鐘

題六叔安宇山居

數椽斜出白雲間二頃湖田繞綠灣春色乍明牆外樹
秋風不到夢中山竹林日暖芒鞋遠荆樹花繁老鶴閒

怪道舞衣添點點稱觴多瀆酒痕斑

白桃花

漁郎小住別成邨未許紅塵點雪魂有韻相通香黯淡
無言獨對月黃昏銀塘淺水斜畱影玉洞春風不記痕
最是清明重到日多情何處倚柴門

閒居奉懷孫靜寄夫子程景暉上舍二首

踏盡紅塵尙素衣燕臺霜月事全非沅湘雲冷蘭空採
關塞天黃雁自飛儘有溪山埋塊壘笑看裘馬盡輕肥
春風應識先生意不送琴聲出竹扉

垂楊蕭瑟覆清渠
記取胥江九月初
一自青山停棹後
不堪黃葉爇燈餘
秋風鱸膾朝沽酒
春雨梅花夜讀書
荷日西牕重翦燭
輕潮珍重寄雙魚

春風引

春風吹人不知重
花氣搖香波折凍
淡雲徐捲金鳥飛
鴛鴦睡結相思夢
暖入深閨蕩細煙
紅妝少婦停紫絃
關山凝睇馳空霧
陌頭柳色青於錢
錦箋寫字眉蹙蹙
鴻雁高翔不可逐
焚香小拜祝封姨
早送江南帆一幅

種芭蕉

小雨池塘淨綠苔
土膏泉潤試新栽
北牕移取深深處
莫被東風暗拆開

尙憶吳門九月天
離人獨上木蘭船
憐君畱得相思夢
夜雨聲聲滴枕邊

綠蔭垂簾寂寂春
露凝點點墨痕新
從今雪滿吳山夜
添箇王維畫裏人

夜坐

白露下庭際
月色猶未已
長空涵靜氣
遠煙收不起
望久寒漸生
微風來樹裏
清機紛吾前
翛然發妙理
環顧

有餘思簡默通太始徵逐何勞勞萬籟寂若此夜氣豈
久存枯亡況在彼長嘯悄無言孤燈爇小紫

觀劇席上作

匹馬秋風舞湛盧丹誠耿耿片心孤卽今滿座頭如雪
休向昭關訝子胥

秋江木落水生波別恨盈盈兩地多江下芙蓉江上柳
不堪憔悴爲郎歌

花落鶯啼倦獨遊綠牕春睡下簾鉤重門不鎖相思夢
直到山窮水盡頭

宛轉當筵舞不辭紅牙鐵板故遲遲何截一曲相思調

贏得劉郎扇上詩

馮丈默齋贈以詩扇

對月懷程二景暉時聞君在崑山

微風西南來次第入茅屋新月生清光林端窈然綠吟
蟲雜遠近斷續不成曲風月良復佳幽懷惜徑宿之子
天一涯酒醒念孤獨江水清且深遠山高欲盡白雲紛
往來上下難相逐愁心寄明月隨風到崑麓嗚呼春風
不可尋明月時見缺月圓月缺喜有期千里萬里長離
別

分菊

新芽初茁綠蒙茸，牆角橫斜草不封。
翰卻淵明三逕裏，分行栽菊未栽松。

題菊花老少年便面爲戴翁安吉壽

葉葉枝枝老更妍，分將秋色短籬邊。
花時不管西風笑，頭插黃花說少年。

留春詞

春光少向花間住，問春欲歸歸何處。
落紅滿地悄無言，指點江南春歸路。
江南春色多迷離，紫陌遊人不知數。

長空風細裊晴絲花街日暖騰香霧酒帘斜認綠楊樓
畫舫橫搖青草渡公子金鞭趁馬蹄美人玉笛憐天暮
九十風光事漸非百年歡樂難如故夜月千林叫杜鵑
狂風三逕團輕絮好花直待一年看冷落人間霞與露
欲種榆錢十萬株細買春光雲外駐畱春不住春無語
灑淚送春任春去但醉東皇一百杯斑龍遲駕白雲馭

雨

飛鳥寂然去深池受雨聲林端山色變天際水光平有
客談幽魅無花落豆棚晚雲吹不盡茶事洗銀鐙

復雨

雲生飛鳥外風急落花邊
一夜黃梅雨千山白瀑泉
草垂新竹逕蛙鬧暗池烟
隱約漁歌動前村泛酒船

愁霖歎

淋漓無乃傾銀河平疇水滿浸新禾
市中米貴數錢多
米貴猶可禾死則那

午日

新蒲似劍碧生香勸酒歌聲雜慨慷
風景不殊仍此日
雲山無恙更清狂
一江流水尋漁父
千古才人哭孟嘗

我亦郢州能賦客醉來高唱舞斜陽

七夕

未是仙家好別離年年重此訂相思波平銀浦風無力
月淡梧桐漏正遲絕塞從軍悲劍影空闈乞巧認蛛絲
卻憐兒女陳瓜果共說嫦娥可許知

九日同左靜友李庶馨楊月峰小飲因登郡城望

白兆山

秋山爽氣與人殊樹杪浮烟若有無但使黃花畱客笑
未妨側帽倩君扶城頭落葉堆寒澗邨外漁舟摘晚菰

醉後好期明日約攜將襍被訪匡廬

李南洲招同安實夫伯氏仙友往白兆山雨阻不

果

恰有黃花插帽時年來無限感秋詩
風吟落木聲聲冷石咽寒泉滴滴遲
流水桃花空往日白雲紅蓼寄新思
不須對酒頻惆悵一角蒼茫在竹籬

春雨同王三表兄夜話分韻得春字

翦燭論文快飲醇細聽疎雨灑芳塵
茶煙欲散風還聚酒力初消火不勻
碧草想生溪上路輕寒先送閣中人

推牕幾向前邨望報道梅花占九春

庶馨許刻圖章久未見貽戲以小詩促之

扁舟攜得嶺南雲爲倩君揮郢客斤山歷太湖林屋遠
不知何處辨奇文

石銜五色勞飛燕葉鏤三年陋棘猴笑指雲烟山外起
休將側理費龍油

微雨頗寒臥不成寐達曉春雪正甚用聚星堂韻

寄家兄香巖

金尊呼酒浮蕉葉深院梨花開作雪春雨浙瀝生輕寒

空添半臂凍欲絕龍公作意揚餘威夢醒忽驚老竹折
長風吹天削春氣牕紙爭明燈就滅置身渾在石室中
呵手亦復笑鉗掣泥香初解濺新苔梅肥欲綻斂紅纈
江天清峭豁雙眸獨立深懷增騷屑世事浮雲那許知
風花過眼成飄瞥不如踏雪登峨嵋尋春卻共山靈說
天空澹蕩新月涼山公嘯和我擊鐵

挽戴安吉

春雨春風酒未醒落紅吹遍舊園亭題來黃鶴雲空白
夢去洪山草更青雪夜漫留王氏棹少微休訝謝家星

晴川閣外重遊日
嗚咽江流不忍聽

春城晚眺和六叔安字韻

蒼然落日下層城
遠水兼天一色清
雲影萬峰能變幻
烟光千樹欲縱橫
心多爲役悲前事
壯不如人悔此生
猶有臨風杯酒好
醉來瑠瑤聽秋聲

觀刈菜

農事遲未舉
凌朝春雨足
園蔬頗欣然
飢鳥憾剝啄
老圃彌霜鎌
青蔥快集目
兩手披拂腰
不伸循畦細
進足或縮土
鬆刃快根難
畱春蠶萬箔
聲簌簌連場
散漫割

青雲左右隨身自分族大兒雜踏小兒笑攘攘爭攜入
茅屋新炊香稻雪翻匙嫩綠蔥蔥甘如飴生不願列五
鼎浮千卮郎食猩猩脣妾食鯉魚尾神昏酣豢口力疲
君不見東坡居士謫海時日爲一摘殊不辭氣飽霜露
土膏滋液流齒頰猶吟詩人生能嚼菜根否何弗買牛
賣劍師樊遲

寄楊表兄

一番風雨亂煙波陣陣飄紅怨楚歌明日欲扶殘醉到
牡丹花落恐無多

紅箋待醉月初三
春色飄零酒不堪
剩有道園吟好句
青山一髮是江南

庭前山茶

不共霜華鬪曉風
偏邀桃李結芳叢
深堂初日添顏色
百朶齊開鶴頂紅
色深少態憶東坡
葉底枝枝翦絳羅
恰似珠娘閒立處
村妝掩映綠婆娑

春夜聞雁二首

獨夜嗷嗷望北歸
乾坤何處不翻飛
生憐萬里雲橫塞

慣是 三秋雪滿衣
春渚蘆平藏霧穩
畫簾燈暗數星稀
堂前亦有銜泥燕
補壘呢喃弄曉暉

風雨關山行路難
征鴻聲裏獨憑闌
天光連水雲迷影
月色辭霜陣怯寒
遠道殷勤修羽翮
素書珍重報平安
長門處處傷春甚
莫送悲音更減餐

題綠香閣二首

月落 銀河影不流
歌聲腸斷白蘇州
風高弱水三千里
春接蓬山十二樓
往事依稀爭鹿馬
微生笑傲薄蝸牛
無端搔首歌天問
爲倩鄰家玉笛收

東風猶入舊園林
吹落傷春萬里心
紅雨無端催寂寞
青山何處足登臨
一簾鳥語愁相對
半幅溪光冷欲侵
回憶滄浪亭畔路
垂楊空鎖暮雲深

簡李南洲

疎牕山色未全遮
風景清幽記若耶
小婦寫詩吟柳絮
先生春夢付桃花
林邊落子猿窺奕
竹外浮煙鶴聽茶
寄語青蓮李居士
爲攜蠟屐訪煙霞

風雨夜坐有懷偕同學諸子限咸刪韻得五言律
六首

春色飄零甚風聲響古杉輕陰低薄暮寒月墮深巖坐

客深王大

謂王芝山

論詩愧阿咸

謂藻川叔

庭花知落否曉燕帶

泥銜

憶昨西牕夜蕭然獨閉關空階森百鬼暗水響千山回首悲春暮驚心更雨還微聞無麥告燈炮各愁顏

聊復思元度烟村掩葦闕

時香巖兄之南莊

悲愁兩地隔風雨

一身閒刻燭遲催句添杯薄上顏垂簾更漏永幽夢落

春山

三載江南夢相隨客子帆馳驅添白髮

家大人之江甯南已三年矣 霜

臻著青衫此夕知遙憶平生薄轉銜桃花江水漲風雨
送雙緘

蘇門長嘯客嗜好共酸鹹動作經年別仍遲一紙緘雲
鵬今得意市虎昔聞讒不覺荒雞動吳鉤躍玉函謂靜
寄先

天地留清氣吾徒得大閒紅塵虛素志白髮憶青山浪
跡魚千里文心豹一斑燭闌疑欲曙月色起前灣

晚歸綠香齋看月二首

門閉亂山高牕虛峯影落不知月色涼忽訝羅衣薄輕

風吹我行小徑行略約溪烟淡欲平十里晚漠漠微光
瀉清影漸次明虛閣美人期未來彈琴嘯孤鶴

初月光欣欣清波不肯暮憑闌一以眺深陰暗嶺樹田
歌來遠陌唱酬足野趣乘風有斷續同心殊未誤適體
亦所樂習勤乃吾素朝山怨風日暮山怨烟霧君看百
年人月明多行路

見牧童騎牛浮水戲爲三絕

騎得烏犍飲上流浪花分處穩如舟長途不少風波客
勒馬爭誇五鳳樓

四圍野色平於掌一幅波光靜欲迎老去田單君莫問
消閒贏得棹歌聲
浴罷牽餘曬晚陽閒眠芳草麴塵香生綃爲寫波中影
不獨雙瞳米老忘

重過楊氏草堂偕庶英香巖諸君子

屐聲細逐賣花來斗室琴罇爲客開記得去年寒食後
青衫紅雨踏蒼苔

山村花暖鷓鴣啼遊女聲聲唱大隄遙指綠楊城郭外
不知行過小橋西

感興四首

芸牕斜日語依依百步愁城莫解圍
袍笏枉畱頑石拜
錦茵閒看落花飛塵中玉湛癡仍甚濠上莊生興不違
爲汝舉頭勞指點雲峯面面插崔巍

苔逕松花摘可餐
鍵門無恙酒懷寬
半生白眼風波老
一笑紅塵語默難
高閣午陰清夏氣
平塘暮色弄春寒
知君共此嶽崎相
羸得旁人拍手看

時名久付馬牛呼
料理山堂養竹梧
白醉閣中忘魏晉
黑甜枕上夢華胥
諸公碌碌推龍尾
壯士蕭蕭弔狗屠

興極試吹蒼玉笛，憑誰寫我耦耕圖。

萬頃雲天鼓怒濤，愁心終古怨勞勞。多君赤水分珠品，老我青山席緼袍。風落寒江星斗動，月臨滄海太行高。北平飛將聞征虜，醉撫吳鉤繫錦條。

園林初夏二首

人靜虛堂碧影滋，緒風淡雨落花時。臨書獨隱烏皮几，漉酒閒尋白接籬。山逕草深藏雁字，橋陰蘋細聚魚兒。奚奴爲語清齋日，綠韭畦頭折露葵。

忘機日逐海鷗羣，適興澆書對麴君。密樹連山朝霧重，

流泉礙石落花分
羅衣初翦香經手
幽夢頻回冷臥雲
差喜草亭閒俗客
無妨野老問耕耘

新秋夜坐

炎蒸如作相權退
遂斂威涼風送秋
意林末來微微散
髮步庭際遠望白
雲歸竹露淨蕉影
荷氣涼羅衣吟蛩
奏新曲四壁相依
依蕭然塵壒中領
此靜者機

大宇苦局促秋色
開深景兀兀對高
空林泉引虛靜天
濶散星光池平定
月影氤氳荷氣上
隱約山容整形神
此超越浩然發清
警終軍志少年馮
唐悲素領來日故

大難欲挽無修綆，樂哉壺中翁。迹與塵俗屏。

九日無酒籬下看菊偶作

西風蕭瑟動蒹葭，爲怯登臨感歲華。十里村醪思白墮，
一庭秋影瘦黃花。細簪破帽憐塵鬢，笑引清魂對晚霞。
記取明年畱醒眼，未妨桑苧共煎茶。

過南禪寺

大雲庵側水雲清，碧瓦紅牆遠對城。微雨村村春欲上，
黃花不傍綠苔生。

竹院消閒愛獨行，僧寮見慣絕逢迎。香山佳句消煙雨，

楊柳春風舞不成

白太傅藏自寫詩于寺中今人無復能知者

文泉姚明府祖母趙太宜人八十母陳太宜人六

十雙壽徵詩趙節孝待旌

鍾郝家風姓氏香平反輿頌滿河陽恒春樹美移南國
長樂花開蔭北堂雲外彩鳧看羽翼山邊蓆草尙芬芳
霞杯捧向庭闈笑爲數生年正履霜

高懸寶婺照城陰六十年來茹苦深此日稱觴同獻壽
當時化石獨驚心蒼松枝飽三冬雪碧柰花銜五色禽
何事陳情誇孝伯板輿奉處卽瓊林

碧潭秋月

愛此碧潭月徘徊城上樓桂花吹不落散入萬家秋

高岡梧雨

十里高岡雨梧桐翠欲迎未須歌水調葉葉是秋聲

石羊千阜

金盃人間出殘碑陌上平最憐春草色碧到楚王城

羅陂春蛙

湖水粼粼碧晴蛙閣閣鳴深林鐘磬出助爾梵音清

虎岩乳賢

射虎初歸夜彎弓石應弦豈知生令尹端藉使星賢

北河分流

湏水來千里中分兩派潮離情有長短同付木蘭橈

隔浦風帆

風迴波上烟月掛雲中樹江天不見人布帆自來去

曲湖曉雪

重戴披仙氅騎驢得得來峨眉天半畫倦眼一時開

寓園雜感

苔徑惟期二仲尋垂楊院落自沈沈酒能友我山兼水

鬼亦憐人鶴與金雕擊西風真得計雲生北岫本無心
雀羅不用閒門設愛聽春深百囀禽

壽吳江張廣文鯤

帶水吳淞接春風黍谷溫才名三絕擅風度九齡存賦
獻明光遠筵開杖履尊卽今湖海士捧袂託龍門
具區三萬頃碧玉削芙蓉登眺真無外招攜得所宗春
光浮寶樹風韻奏長松自有商山調相將綺季逢

張璋大紅牡丹

花事闌干綠蔭中披圖暖拂玉堂風洛陽貢騎尋常色

奉日雲標第一紅

濃豔生霞露欲流
篆香煙細爲勾留
累他酒醒華清夜
重按新聲菊部頭

風襲輕綃影倩扶
前生蓬島見來無
夢中綵筆君畱取
一搦滕王蛺蝶圖

莫漫人間老眼難
金觥重製鄭都官
長安三月車如水
空乞齊奴步障看

虎邱尋鐵華巖第三泉

白黿踏江風浪惡
倒捲寒雲雲欲落
我浮輕舸望中冷

泉脈神封萬古壑常聞九龍山水遞奉黃閣復聞第三
泉虎阜昔疏鑿平生屐齒未得遍乘興凌晨尋舊約溪
光樹色媚清曉油然滴翠擁北郭講臺石立人語稀危
塔烟開天影拓路迴徑古逼深巖一水澄澄養沖漠光
寒波淨山骨平鬚眉暈碧心靈淪驚雷菟老桑苧亡小
鼎細煙徒約略可惜清姿九百年于今抱獨藏幽薄山
靈大笑固如此不爾飄零獨吾子山中之人閱多矣

晨過石觀音殿

英英流白雲眾木會新響壁薜綴明露微風動烟幌巍

茲不壞身水月現圓朗磨崖鏤金書沈括胡宗愈昔宗仰
壁有諸公題名此生浮夢寐幸免懼爲枉何時廓塵心愜我世
外想綺霞扶朝暾復哉入氛塊

白公堤

七里山塘積翠連羅衣風溼一溪烟紅樓斷處聞簫鼓
一樹垂楊一畫船

贈泗州徐晚亭秀才

春老黃鸝喚不回水亭鎮日故人來八公草木銷兵氣
一代山川出賦才駿骨似聞求冀野麀頭森爾列高槐

可憐入洛紛紜路變幻浮雲望未開

琴劍天涯杖履尋翹材猶憶託龍門

晚亭舊客番
馬相公所

西風

塵可污紈扇南國人誰賦芷蓀此日清歌思帝子當年
湛露感君恩相期一聽江城笛世路蒼茫未要論

于清端祠

直節清心兩不疑睢州名德後先垂

潛庵先生

上書我欲憐

陳賈不及滇南義瞽師

事具邵青門
端公家傳中

春申君廟

風煙千里接荆吳桃夏宮荒盡綠蕪埋血棘門空盜國

殉身秦舍竟存孤徒令主約憐三戶可得銷兵闢八區

昨夜寒江秋雨急靈潮莫待子胥俱

呂不韋進子姬而滅六國黃歇進子

姬而滅楚均爲本國所誅其計同其禍亦同

食梅子作

如豆青青未染金一匱餉比蜜林檎半生措大畱真味

萬樹花光憶晚陰澣齒尙思軍士渴調羹幾費廟堂心

烟蘿五月迎梅雨

烟蘿山名在姚安府諸葛南征憩軍於此

爲洗

天兵下象林

時滇南莽匪未平

八月十一夜坐月同安宇叔伯氏香巖

一夜秋心落海城倚樓人影正分明露濡密葉螢初重
魚激清波月有聲倦眼乍開天柱遠薄寒漸覺葛衣生
渺然黃鵠磯頭思列嶂攢峯恐不平

時欲歸未果

桂樹連蜷蔭曲阿徘徊休問夜如何數通畫角連雲起
萬里秋聲入鬢多竹徑花憐深淺路蓼灘舟任去來波
憑君料理南樓興不斷飛鴻已渡河

中秋登虎邱

不盡秋光付劫灰斷鴻影裏共登臺天垂大幕羣山立
風送巖香老桂開幾日林泉塵鬢改一聲清磬白雲來

蘇軾詩集卷二
三
飄輪莫怨蓬山遠試按霓裳入月迴

遣興

流水不成夢孤花相對間夜深初見月薄醉若爲顏亦有安期約伊予塵網間浮雲猶未定天末日移山

酬月

秦餘山外月顧我入書樓邈此無人態真成出世遊微雲空作影病葉不禁秋一笑扶殘醉持杯爲月酬

移居顧氏小滄浪亭題壁

闔闔城外山水絕涇香巖靈梅作雪闔闔城內風月新

紫樓白屋連紅塵我來此地眼許大矯然忽墮煙霞外
烟霞靄靄松檜生虛堂灑埽閑詩情桃花溼共疎雨墮
溪流急載山影行水亭小榭共靜遠居然不負滄浪名
科頭踞石細濯足撫景忽憶城南曲孤亭斜倚大雲庵
曾訪滄浪指遺躅玉皇案吏蓬萊仙淋漓大筆飛雲烟
才高觸忌亦常耳一網乃盡中朝賢噫嘻怪事願有此
白簡騰章祇杯匱殺憐不屑問汝曹千古風波此溪水
至今鉗網得已無君輩乃存此人死願生願生爾鼓琴
聽我高歌梁甫吟浮雲急雨任翻覆寒流如鑒平我心

何當明月攜書讀，浮白長呼蘇舜欽。

虎山橋夜泊

看山未肯別纜解，紅橋邊落日下溪樹。
波色爲淪漣，遙岫合蒼翠。隨風來娟然，稍稍遠人村。
喧語出暝煙，中流墮塔影。昏黑驚我前，將船就梅根。
且抱寒香眠。

由光福往元墓探梅

春色不到地，澹蕩和天風。吹來樹枝頭，十里雲濛濛。
我行愛曉色，扶桑鋪輕紅。攜杖快登陟，謀目各不同。
遠峯標翠眉，一一位湖中。湖波亦澹涵，動漾斂其雄。
揚手招

竹林中有紫芝翁絃揮太古聲黯淡驚飛鴻暫將鹿皮冠躡跡聽吟龍

登聖恩寺

古木青峯不計春香臺層聳太湖濱亭藏飛白輝雲日

山半有御詩亭僧語衣黃識

聖人度南巡三臨幸山截濤聲空谷振燈畱夜氣曉鐘親

還元閣外梅花老憶絕風流宋玉身牧仲太宰西山探梅詩榜尚在閣中

坐還元閣懷徐侯齋先生閣榜爲先生手書

山峩峩水深深美人不語傷我心涼風遠近散烟樹魂

歸或在青楓林此時客去日西匿湖光摩天天若卽援
琴一鼓石氣青梅花漠漠傳神色

華山翠巖寺

山景賞未窮新途峯忽換鳥道策孤筇心目雜欣憚壁
坼樹就敲磴迴手頰扞蕭蕭長松林流濤落天半僧閒
罷午鐘揖客陟層觀巉岩束身出目置乃霄漢白雲驚
風開縹緲與世斷俯視山蒼蒼累然不可算

支硎山

昨登萬峯嶺巧石頗學張南垣搗來臨硎路劣崩高下

愁攀援面平側削疊秀氣頽丈自愧羣中蹲東風吹綠
草欲長淺黛間抹煙稍痕蒼苔冷積太古色峯峯不受
繁陰昏山上樹支公鑿室無架構清風叩戶雲登門寒
泉細細流石髓一汲欲醒梅花魂惜哉鶴唳不得聽蕙
帳空復愁青猿我來未敢稱都講徑將明月歸前村

舟中望惠山

陽春橋下水波明帆轉吳山的的迎雲壑曉藏烟外樹
樓臺全出鏡中城黃公澗古鳴琴遠陸羽泉畱活火烹
四度經過四惆悵空將作達負時名

丹陽晚泊

百里丹陽道扁舟十日程堤高春樹隱潮迅急帆爭戰
伐朱方舊風煙白下平慶亭聞射虎豪氣更縱橫

丁卯橋訪用晦故居

蘭陵江色發春醅丁卯橋南一望開菊徑久荒餘酒社
風流不盡屬詩才連岡委地山重攀急澗迎潮水卻迴
無限高低禾黍意憑闌指點共徘徊

次潤州

篷背輕霜足曉晴舳艫銜尾集江城岷澗隔岸聲先到

草色連山綠不平，赤塞新收馮盎部。
朱鳶開罷郭昌兵，開官軍滇南大捷由來北府雄南國。
只偃牙旗鎮舊京。

蒜山

雲氣接蓬冥，飛濤下洞庭。
日華蒸海赤，山色渡江青。
百戰空荒壘，千村布遠星。
登臨翻自愧，耕鑿仰王靈。

登甘露寺

象闕岩巖俯太清，招攜共入翠微行。
登高人有風雲氣，懷古江流鐵馬聲。
白帝旌旗空北伐，黃初戈甲竟南征。
葦衣植木原奇計，不道樓船下益城。

午發繁昌晚抵大通始泊

西風捲浪白於霰繫纜連朝傍江縣長年夜語出艙立
漸喜高桅脚轉開頭振舵凌清晨頽岸流沙苦相戀
舟膠淺故云春潮送客騰輕舟五兩飄搖入晴甸迴帆過鼓
真有神譬如矯鵠乘秋薦依微遠樹排空青峭削危磯
激迴旋水光天影浩莫極入眼奔騰留餘眩荻港西上
望銅陵懷煙春岫吐蔥蒨我行兩月不千里順流估舶
篙師羨崇朝得勢辭泥沙飛揚直與雲爭便風濤滾滾
破浪來前舸參差翻後殿村墟向晚波亦平連檣相次

颯力倦高吟，卻憶謝元暉。餘霞散綺江，澄練

題夢筆生花圖

青蓮居士謫仙才，秀啓繽紛筆苑開。紙帳梅花春月曉，
何妨重入夢中來。

次安慶

九十春光已過半，扁舟猶自滯江干。濤聲捲雪千流合，
山色連雲一脈攢。志士殉名光俎豆，蒼生託命藉治安。
行行最愛如膏雨，柳絮花妍取次看。

孫男方

坪小岩
增萩川
坪季平

校字